

Istorgia economica dal Grischun

Part 1: Dal temp preistoric a la Republica da las Trais Lias

■ **L'economia grischuna è sa sviluppada da vegl ennà sin il plaun local, regional e continental. Sin il plaun local predominava l'economia purila autarca, sin quel regional vegniva vendi quai che vanzava e cumprà quai che mancava e sin il plaun continental sa splegava il transit, l'import e l'export sco era l'emigraziun stagionala e temporara da forzas da lavur e da schuldads.**

Temp preistoric

Las enconuschentschas davart l'economia dal temp preistoric èn rudimentaras. Enconuschentas èn numerusas colonias e lieus da lavur dal temp neolitic (ca. 5500–2200 a.C.) che sa concentreschan surtut en las vals situadas pli bass ed en las regiuns da transit. A Cuira (areal Ackermann) ed a Castaneda han in chatta fastiz d'ina agricultura cun arader dal temp neolitic. Ina colonisaziun intensiva dal Grischun è succedida pir en il temp da bronz (ca. 2200–800 a.C.); ella steva apparentamain en connex cun la tschertga da giaschaments d'arom.

Cumbain ch'ils abitants da las Alps dal temp da bronz vivevan oravant tut da l'agricultura e da l'allevament da muvel, sa laschan cumprovar era l'exploitaziun d'arom (tranter auter per il Surmeir, l'Engiadin'Ota e la Lumnezia) ed in commerzi sur ils pass alpini. La chatscha na giugava betg pli ina gronda rolla en il temp da bronz. En il temp da fier ha cumenzà a flurir l'economia monetara, il commerzi da barat è dentant vegni substitui en il Grischun mo plaunsieu tras il commerzi en valutas.

Temp roman

En l'emprim temp imperial e particularmain en l'antica tardiva han existì strengas colliaziuns cun l'Italia dal Nord. Da l'emprim fin il terz tschientaner èn s'orientadas las vals alpinas dal nord, sco il rest da la Rezia Occidentala, pli ferm vers las provinzas romanas dal nordvest, quai che resorta tranter auter da la Terra Sigillata (vaschella) importada. Ina basa existenziala purschevan vinavant las resursas mineralas (en il temp roman oravant tut il fier, ma era il cristall ed il crap da lavetsch) sco era l'economia da transport, la pasculaziun, l'economia forestala e l'agricultura.

Tenor ils chats eran la gronda part da las vals alpinas grischunas abidades gia avant lur conquista per propi. Contacts cun l'Italia èn attestads, cumbain mo sporadicamain, era al nord da las Alps, per exempel tras las munaidas padanas chattadas a Cunter en Surmeir e tras fina vaschella d'import scuverta a Cuira. La posiziun da Cuira era tipica per citads romanas: da qua manavan las vias sur ils differents pass grischuns e da qua partivan probablmain era las navs sin il Rain vers il nord. Ils bogns, il martgà, las chasas da commerzi, ils albierts, ils tipics edificis lungheints cun lur locals d'artisanadi e d'abitari sco era imports documenteschan la funziun da center da la citad da Cuira.

Temp curretic

L'economia retica dal 6avel fin il 15avel tschientaner cumpigliava ils quatter suandants secturs principals: l'agricultura, l'exploitaziun da materias primas, ils products da mastergnanza, il traffic da martganzia



Via da sauma sur il Pass dal Bernina.

MALETG DAL 18AVEL TSCHIENTANER

ed il transit. L'agricultura aveva da s'adattar al clima ed a la topografia da las Alps. La cultivaziun da graun, vin e pumicultura era liada a regiuns climaticamain favuravlas, entant che l'allevament da muvel cun la produenziun da latg, chaschiel e charn vegniva pratigada fin ad autezzas enturn 2500 m. L'orticultura e l'economia da rimnar (inclus la chatscha e la pestga) cumplettavan la produenziun agricola. Quella na pudeva numnadamain gia en il temp autmedieval betg cuvrir l'entir basegn dal pajais. L'import da martganzia era indispensabel e cumpigliava graun, vin e sal. L'export è stà pussaivel sin il champ da l'allevament da muvel.

En il sectur da las materias primas predominava l'exploitaziun da fier (Bernina, Valragn, Surmeir), explotà vegniva dentant era argient, per exempel en la Val S-charl. Impurtants eran ultra da quai il tagl da lina sco era l'exploitaziun e l'elavuraziun dal crap da lavetsch. Manaschis d'artisanat eran sa stabilids oravant tut en las citads (Cuira) e lung las rutas da transit. La vendita succedeva per part tras ils martgads ch'avevan lieu ils dis firads en las singulas vals.

Il traffic da transit sa splegava en il temp medieval sin pliras axas, da las qualas la ruta dal Set, controllada a partir dal 10avel tschientaner tras l'uvestg da Cuira, era la pli impurtanta. L'organisaziun e l'accumpagnament da quel eran l'incumbensa da la servitid episcopala e da las corporaziuns da berniers. L'integratiun surregionala da la Rezia en il barat da martganzia en svilup sa reflectescha en las munaidas chattadas, tranter las qualas prevalan quellas battidas en la Lombardia ed en la Germania dal Sid, cumbain che l'uvestg da Cuira possedeava in'atgna zecca.

Temp republican (16avel–18avel tschientaner)

Fin viaden il 19avel tschientaner vegniva pratigà en las Trais Lias oravant tut l'agricultura. In'impurtanta activitad accessorica lung ils passadis tras las Alps furmava il transport da martganzia accumpagnà d'in commerzi cun l'exteriur. L'exploitaziun da minerals ed il commerzi da lina (era export) eran derasads era en questa epoca. La vita economica sa splegava surtut entaifer las vischnancas ed ils vischinadis che possedeavan las regaglias a partir dal 1524 e 1526 (Artitgels da Glion) e che pudevan relaschar en atgna autonomia prescripziuns e fixar taxas. Il Stadi da las Trais Lias s'occupava pauc da l'economia, el s'engaschava però en il rom da la politica da l'exteriur per in levgiament dal commerzi e per in provediment segir.

Cun la dissoluziun dal domini feudal en il temp medieval tardiv èn sa midadas las cundiziuns en l'agricultura: il pur, che operava e produciva pli libramain, ha cumenzà a megliar il furs (tranter auter cun agid da l'arader, da la fautsch e d'indrins da sauar), augmentond qua tras la raccolta. La furma d'economia la pli derasada è restà il manaschi mixt. L'expansiun da l'allevament da muvel basegnava in'extensiuon massiva da las pastgiras e da las alps. La produenziun alpina serviva oravant tut al provediment intern; l'Engiadin'Ota produciva dentant gia enturn il 1520 chaschiel grass per l'exportaziun. La pumicultura e la viticultura en la Tumeastga ed en la Val dal Rain sco era ils guauds da chastagners e las vignas en las vals dal sid han procurà per ina tscherta varietad en regiuns pli bassas.

L'artisanat rural serviva en emprima lingia al basegn local ed ils mastergnants spezialisads eran ambulants. Prescripziuns concernent ils pretschs ed il pajament (usitadamain en natiralias) han gi per consequenza ch'ils mastergnants rurali èn restads plitost paupers. Tuttina èn attestads era sin la champagna fravis d'art e scriinaris ch'han gi success e cuntanschi renum surregional, sco per exempel ils fravis d'art Laim ad Alvagni. Il mastergn organisà en mastergnanzas è s'establì mo a Cuira (a partir dal 1465). Las prescripziuns (prohibitivamain) severas han impedi la domiciliaziun da novs manaschis u da manaschis pli

gronds. En il 18avel tschientaner han aristocrats avert sin la champagna intginas manufacturas, oravant tut filantarias da mangola e da saida che vegnivan manadas per part tenor il sistem d'ediziun (per exempel a Tschupegna). Bleras da questas fundaziuns n'èn dentant betg sa mantegnidas ditg.

L'exploitaziun da numerus minerals da fier è attestada a partir dal 1200 (da quel onn datescha l'emprima affittaziun d'ina avaina da metal en il Puschlav) fin viaden il 19avel tschientaner en tut las regiuns dal Grischun. A Tavau, a Scuol ed en la Val Schons vegniva explotà temporarmain era argient. Centers pli gronds d'elavuraziun da fier e metals nunferrads sa chattavan a Filisur ed a Bellaluna (vischnanca da Filisur), pli tard a Seglias ed en la Val Schons.


Ils pass grischuns colliavan l'Europa dal Nord cun l'Italia ed eran, cumbain ch'els stevan en la sumbriva dal Brenner e dal Gottard, da grond'impurtanza strategica ed economica. Suentar ch'il Set è vegni rendi charrabel a la fin dal 14avel tschientaner, han las vischnancas partecipadas avert il 1473 la via tras la Viama-la. Las vischnancas a la Via Sut (Spleia, San Bernardin) e quellas a la Via Sura vers il pass dal Güglia e dal Set èn sa reunidas gia baud en sis respectivamain quatter associaziuns corporativas da transport (ils ports) ch'avevan, sin fundament da lur monopol da transport, da procurar per il mantegniment da lur tschancuns da via. Cun quai che la mar-

tganzia stueva vegnir chargiada mintgamaì als cunfins dals ports sin ils animals da sauma da la corporaziun vischina, durava il transport tut en tut plitost ditg.

Eveniments politics u economics avevan sutmess la quantitat dals bains da transit a grondas fluctuaziuns: enturn il 1600 ha quella cuntanschi sia culminaziun cun ca. 14 000 saumas per crudar durant la Guerra da trent'onns ad in dieschavel; cun la construcziun da la Via commerciala a la fin dal 18avel tschientaner è ella alura puspè creschida a passa 10 000 saumas. Las entradas da dazis, pedagis e pajas da viturins sco era autras entradas dal traffic da transit han fatg da quel la segund gronda funtauna d'entradas da l'economia publica dal Grischun.

Il commerzi è sa sviluppà a moda parallela cun il traffic da martganzia. Cunquai che mintga burgais (bundsman) da las Trais Lias pudeva far libramain commerzi, vegniva barattà gia baud – oravant tut al sid (Ligiaun, Tiraun, Vnuost) – paintg e muvel sitg per graun, sal u vin. Dasperas existiva era in commerzi professiunal da sal, vin e ris. Pir en il temp modern tempriv ha Milaun remplazzà Turitg sco furnitur principal da graun al Grischun. Ris era oravant tut ina martganzia da transit. Sal survegnivan las Trais Lias dad Alla en il Tirolo e da Reichenhall en Baviera, entant ch'il sal marin venezian era, per motifs da qualitad, pauc derasà. Cun agid da mesiras legalas e da controllas severas dals pretschs e tras il possess da terren da famiglias dominantas en las Terras subditas vegniva garantida la controlla dal vin da la Vuclina. Fieras (ca. 50 a la fin dal 18avel tschientaner) cumplettavan ils martgads da l'emna e servivan l'atun a la vendita da muvel. Chasas da commerzi èn naschidas oravant tut en il 18avel tschientaner lung las vias da transit, per exempel a Glion, Tavau, Cuira (ils Baviers e.a.) ed a Tusaun (ils Rosenrolls).

In'impurtanta funtauna d'entradas èn stads ils servetschs mercenaris. Las campagnas militaras en l'Italia (16avel tschientaner), la Guerra da trent'onns (17avel tschientaner) ed ils cumbats per l'equiliber politic en l'Europa (18avel tschientaner) occupavan il medem mument fin ca. 10 000 mercenaris grischuns. Per l'aristocrazia eran las campagnas da mercenaris ina fatschenta lucrativa, cumbain fitg speculativa. Per ils schuldads engaschads però furmava il servetsch mercenar, collià per ordinari cun ina gronda ristga ed in pitschen gudogn, savens ina necessitad economica. Il reflux da daners dals emigrants civils en l'economia grischuna n'è betg quantifitgabel (studis specifics mancan), el è dentant stà senza dubi da grond'impurtanza per l'Engiadina. Adolf Collenberg



L'exploitaziun da fier è per part sa mantegnida fin en il 19avel tschientaner.

MALETG: SCHMELZBODEN, TAVAU

Lexicon Istoric Retic

Il LIR cumpiglia bundant 3100 artigels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.